



1. Lutheri. Martini: außlegung
 Job propheten von 1526.

2. _____ schreiben an den
 Bischoff Albrecht zu Magatz.
 1526.

3. _____ daß die werth
 Christi: die ist mein lob
 nach Joh. 1. 1527.

4. _____ antwort auf
 des Königs in England laßen
 1527.



9

Von Der
Widdertauffe
an zween pfarherrn
Ein brieff
Mart. Luther.
Wittenberg.
M.D.XXVIII.

1609
C. H. G.
1609
C. H. G.
1609
C. H. G.
1609
C. H. G.
1609
C. H. G.

Martinus Luther / den würdigen lie-
ben herrn A. vnd A. meinen
lieben freunden ynn Christo.



Nach vnd fride ynn Christo
vnserm Herrn. Ich weis leider fast wol lieben
herrn/das der Baltzar Huebmohr mich auch
vnter andern mit namen einfuret ynn seinem
lesterlichen buchlin von der widdertauffe/ als
olt ich auch seines tōrichen synnes sein. Aber
ich hab mich des getrōstet/ das niemand/ widder feind noch
freund/ solcher seiner offentlichen lügen / glauben wurde/ Weil
nicht allein mein gewissen hierynn verwaret/ sondern auch mein
gerūcht gnugsam entschuldigt ist / durch so viel predigt/ vnd
sonderlich durch die letzten Postillen/ von Epiphanie bis auff
Ostern/ darynn ich ia vberflüssig meinen glauben von der kin-
dertauffe an tag geben habe / Derhalben ichs für vnnotig ge-
acht/ auff solch sein büchlin antworten/ Denn wer wil allen leu-
ten/ ia allen teuffeln die meuler stopffen? Ich habs bisher wol
erfahren/ wo ich dem teuffel ein maul stopffe/ da reisset er zehen
meuler zur seiten auff/ vnd wechst yhe lenger yhe mehr/ das ichs
mus (wolle odder wolle nicht) Gotte befehlen / der darnach/
wenn wir die warheit gesagt haben/ ein rechter richter ist/ vnd
die sachen wol weis aus zu furen/ Wie er denn teglich thut/
als wirs wol greiffen mugen.

Wir hie ynn vnser fursten landen/ haben noch nichts von
dem geschmeis solcher prediger / Gott sey lob vnd danck ynn
ewigkeit. Auch nichts von den Sacraments feinden/ Sondern
sind fein still vnd eintrechtig ynn der lere/ glauben vnd leben/
Gott wolt vns sorder gnediglich also behueten/ Amen. Derhal-

A ij benich

ben ich zwar für mein teil/nicht viel gedanken wider die teu-
ffler bis her gehabt/weil es hie nicht not gewesen ist. Aber euch
Papisten(Ich mus euch so nennen/weil yhr vnter ewrem Ty-
rannen sein musset) geschicht warlich recht / Weil yhr das
Euangelion nicht wollet leiden/musset yhr mit solchen teufls
Kotten zuthun haben/wie Christus spricht Johan. 5. Ich kom-
me ynn meines Vaters namen/ vnd yhr nemet mich nicht an/
Ein ander wird ynn seinem namen komen/den werdet yhr(das
ist/die ewren bey euch) annemen. Doch ist's nicht recht/ vnd ist
mir warlich leid/ das man solche elende leute/ so iemerlich er-
mordet/ verbrennet vnd greulich umbbringt/ Man solt ia ei-
nen iglichen lassen glauben/was er wolt/ Gleubet er vnrecht/ so
hat er gnug straffen an dem ewigen feur ynn der hellen. War-
umb wil man sie denn auch noch zeitlich martern & so ferne sie
allein ym glauben yren/ vnd nicht auch daneben auffhurisch
odder sonst der Eberkeit widerstreben. Lieber Gott / wie bald
ist's geschehen/das einer yrrer wird vnd dem teuffel ynn strick
fellet & Mit der schrift vnd Gottes wort/solt man yhn weren
vnd wider stehen/ Mit feur wird man wenig ausrichten.

Ich weis zwar noch nicht recht/ was sie für ursache vnd
grund yhres glaubens haben/ So zeigt yhr mirs auch nicht an/
vñ begeret doch rat/ wie man solle sich yn solchen sache halten/
Darumb kan ich nichts gewisses drauff antworten/ So seid yhr
zum teil auch selbs widderteufler/ Denn viel der ewern teufls
widerumb Latinisch/die/ so Deudsch getaufft sind/ So doch
ewer Bapst selbst solches nicht thut noch leret/ Den wir wissen
ia wol/das der Bapst getaufft sein lesset/ wo die weiber teufls
yn nöten/wenn sie gleich Deudsch teufls. Doch teuflset yhr wid-
derumb/ so wir bey vns Deudsch teufls/ Als were vnser priester
Deudsch teufls nicht so gut / als der weiber Deudsch teufls/
Wie denn newlich der grobe kopff von Leipzig zu Wolhausen
auch gethan hat/ So doch nirgent der Bapst gebent/ das man
allein

allein Latinisch / vnd nicht ym ander sprachen teuffen solle/
Darumb geschicht euch abermal recht. Widderteußen wolt
yhr / so kriegt yhr widderteußer gnug / die wolt yhr nicht leiden /
vnd wolts doch selber sein / wider ewern eigen lerer vnd meister
den Papst.

Aber wie vnrecht die ewern thun / das sie widder teuffen / las
ich izt faren. Denn es ist ewer schande deste grösser / das yhr
gleich ewrem abgott dem Papst selbs widderstrebt / mit ewrem
widderteußen / vnd stymmen also lerer vnd schuler nicht mit ein
ander / Darumb wil ich dauon izt nicht weiter handeln / sondern
wil euch zu dienst widder ein Papist werden / vnd dem Papst
getrost heucheln / Denn meine lieben schwermer werden mirs
doch nicht anders deuten / (wie sie bereit thun) denn das ich dem
Papst hie mit heuchele vnd gnaden suche / Sintemal wer nicht
yhren tollen schwermen folget / der mus ein newer Papist hei
ssen.

Auffs erst / höre vnd sehe ich / das solch widderteußen von et
lichen furgenomen wird aus dem grunde / dem Papst verdries
zu thun / als die nichts wollen vom Ende christ haben / Gleich
wie die Sacraments feinde auch darumb an eitel brod vnd wein
glauben wollen / dem Papst zu verdries / Vnd meinen / sie wollen
damit das Papstum recht storgen. Fur war / das ist ein loser
grund / darauff sie nichts gutes bawen werden. Mit der weise
mussten sie auch leucken die ganze heilige schrift / vnd das pre
dig ampt / Denn solchs haben wir freilich alles vom Papst / vnd
mussten auch eine newe heilige schrift machen. Also mussten wir
auch das alte Testament faren lassen / auff das wir ia nichts von
den ungleubigen Juden hetten. Warumb nemen sie denn teglich
geld vnd gut an / so doch bose lente / Papst vnd die Turcken
der ketzer haben gehabt & Solchs solten sie auch lassen / wenn
sie nichts gutes wolten von bosen leuten haben.

Narren werck ist das alles. Christus fand auch ym Judischen
A ij volck

voldt der Phariseer vnd schrifftgelerten misbranch/ Aber er verwarffs darumb nicht alles/was sie hatten vnd lereten/ Matth. xxiij. Wir bekennen aber/das vnter dem Papstum viel Christliches gutes/ia alles Christlich gut sey/ Vnd auch daselbs herkommen sey an vns/ Nemlich/ wir bekennen/ das ym Papstum die rechte heilige schrifft sey/rechte tauffe/ recht Sacrament des altars/rechte schlüssel zur vergebung der sünde/recht predig ampt/rechter Catechismus/als das Vater vnser/ Zehen gebot/die artickel des glaubens. Gleich wie er auch widerumb bekennet/das bey vns (wie woler vns verdampt als ketzer) vnd bey allen ketzern sey die heilige schrifft/ tauffe/ schlüssel/ Catechismus etc. O wie heuchelestu hie? Wie heuchel ich denn? Ich sage/was der Papst mit vns gemein hat/ So heuchelt er vns vnd den ketzern widerumb ia so seer vnd saget/was wir mit yhm gemein haben. Ich wil wol mehr heucheln/ vnd sol mich dennoch nichts helffen/ Ich sage/das vnter dem Papst die rechte Christenheit ist/ia der rechte ausbund der Christenheit/vnd viel frumer grösser heiligen. Solich auffhören zu heuchlen?

Höre du selber/ was S. Paulus sagt zu den Tesselonichern/ Der Endechrist wird ym tempel Gottes sitzen. Ist nu der Papst (wie ich nicht anders glawbe) der rechte Endechrist/ so sol er nicht sitzen odder regiern ynn des teufls stal/sondern ynn Gottes tempel. Nein/er wird nicht sitzen/da eitel teuffel vnd vnglaubigen / odder da kein Christus odder Christenheit ist/ Denn er sol ein widder Christ sein/darumb mus er vnter den Christen sein. Vnd weiler daselbs sitzen vnd regiern sol/so mus er Christen vnter sich haben. Es heist ia Gottes tempel nicht steinhauße/ sondern die heilige Christenheit. i. Corinth. iij. darynn er regiern sol. Ist denn nu vnter dem Papst die Christenheit/ so mus sie werlich Christus leib vnd glied sein/ Ist sie sein leib/ so hat sie rechten geist/ Euangelion/ glauben/tauße/ Sacrament/schlüssel/predig ampt/ gebet/ heilige schrifft/ vnd alles was die Christenheit haben sol.

ben sol. Sind wir doch auch noch alle vnter dem Bapstum/ vnd haben solche Christen guter dauon.

Denn er verfolget vns/ verflucht vns/ verbannet vns/ veriagt vns/ verbrennet vns/ erwurget vns/ vnd gehet mit vns armen Christen vmb/ wie ein rechter Endechrist mit der Christenheit vmbgehē sol. Tu müssen für war solche Christen/ recht getaufft/ vnd rechtschaffene glieder Christi sein/ sie künden sonst solchen sieg widder den Endechrist durch den tod nicht erhalten. Wir schwermen nicht also/ wie die rotten geister/ das wir alles verwerffen/ was der Bapst vnter sich hat/ Denn so wurden wir auch die Christenheit den tempel Gottes verwerffen/ mit allem das sie von Christo hat/ Sondern das sechten wir an vnd verwerffen/ das der Bapst nicht bleiben lassen wil/ bey solchen gustern der Christenheit/ die er von den Aposteln geerbet hat/ Sondern thut seinen teuffels zusatz da bey vnd druber/ vnd brauche solcher guter nicht zur besserunge des tempels Gottes/ sondern zu verstorung/ das man seine gepot vnd ordenung hoher hellt/ denn Christus ordenung/ Wie wol ym solcher zerstorunge/ Christus dennoch seine Christenheit erhele/ Gleich wie er Lot zu Sodom erhielt/ als auch S. Petrus dauon verkündiget i. Petri. ij. Das also beides bleibe/ der Endechrist sitze ym tempel Gottes durchs teuffels wirckung/ Vnd doch gleich wol/ der tempel Gottes sey vnd bleibe Gottes tempel durch Christus erhaltung. Kan der Bapst dis mein heuchlen leiden vnd annemen/ so bin ich freilich ein vntertheniger son vnd frumer papist/ Vnd wills auch werlich mit hertzen freuden sein/ vnd gern alles widder ruffen/ was ich yhm sonst zu leide gethan habe.

Darumb ist solcher widder teuffer vnd schwerner rede nichts/ wenn sie sagen/ Was der Bapst hat/ ist vnrecht/ Edder/ Weil ym Bapstum dis vnd das geschicht/ so wollen wirs anders haben/ gerade/ als wolten sie damit sich beweisen/ grosse feinde des
Endechrists/

Endechrists/ Sehen aber nicht/das sie damit yhn am höchsten
stercken/die Christenheit am höchsten schwächen/ vnd sich selbs
betriegen. Den misbrauch vnd zusatz solten sie vns helfen ver-
werffen/ Aber da hetten sie nicht grosse ehre von/ weil sie sehen/
das sie daran nicht die ersten sein können/ Darumb greiffen sie
an/das niemand angriffen hat/auff das sie auch etwa die ersten
sein vnd ehre einlegen mugen. Aber die ehre mus zu schanden
werden/ Denn sie greiffen den tempel Gottes an/vnd seilen des
Endechrists/der drinnen sitzt/wie die blinden die nach dem was-
ser tappen/vnd greiffen yns ferwer.

Ja sie thun eben wie ein bruder dem andern thet ym Durin-
gerwalde/ Die giengen miteinander durch den wald/vnd ein
beer kompt sie an/ der wirfft den einen vnter sich/ Da wil der an-
der seinem bruder helfen/ sticht nach dem beern/ seilet aber sein/
vnd ersticht den bruder vnter dem beern iemerlich. Eben so thut
diese schwärmer auch/ Sie solten der armen Christenheit helfen/
die der Endechrist vnter sich hat vnd martert/vnd stellen sich
grewlich widder den Papsst/seilen aber sein/vnd morden die Chri-
stenheit vnter dem Papsst viel iemerlicher/Denn wo sie die tauffe
vnd Sacrament recht liessen/mochten die Christen mit der see-
len noch entrynnen vnter dem Papsst/vnd selig werden/wie bis-
her geschehen ist. Aber nu yhn die Sacrament genomen werden/
mussen sie wol verloren werden/ weil auch Christus selbs da
durch weg genomen wird. Lieber es ist nicht also auff den Papsst
zu plätzen/weil Christus heiligen vnter yhm liegen/ Es gehört
ein fürsichtiger bescheidener geist dazu/der vnter yhm lasse blei-
ben/was Gottes tempels ist/vnd were seinem zusatz/damit er den
tempel Gottes zerstöret.

Auffs ander/ sagt man/wie sie sich drauff gründen/das sie
nichts von yhrer tauffe wissen/vnd sagen/ Wie weistu das du
getaufft bist? Du gleubst menschen/ die dir sagen/ du seist ge-
taufft/

taufft / Aber du must Gott selber vnd nicht menschen glauben/
Vnd also deiner tauffe gewis sein ic. Das mag mir doch ia auch
ein loser fau' er grund sein / Denn so ich das alles wolt verwer-
ffen / was ich nicht selbs gesehen odder gehört habe / so werde
ich freilich nicht viel behalten / widder glauben noch liebe / wid-
der geistlichs noch weltlichs. So mocht ich auch sagen / Lieber
wie weistu / das der man dein vater / vnd die die frau deine mut-
ter sey: Du must nicht menschen glauben / sondern selbs deiner
gepurt gewis sein. Hie mit weren hinfurt alle Kinder frey / vnd
durfften Gottes gebot nicht halten / da er gebeut / Du solt va-
ter vnd mutter ehren. Denn ich wolt bald sagen / Wie weis ich /
welche mein vater vnd mutter sind & Menschen glaube ich
nicht / darumb müssen sie mich widderumb geperen von ne-
wen / das ichs selbs sehe / odder wil sie nicht ehren. So were
Gottes gebot gar fein auffgehoben / ganz vnd gar.

Desselbigen gleichen / wolt ich keinen bruder / schwester /
vettern noch einigen freund kennen / vnd ymer surgeben / Ich
wusste nicht / das sie mir zugehöreten / weil ich vngewis were /
welche meine eltern weren ic . Aber solchem geist / wolt ich
(wenn ich herr ym lande wer) widderumb dienen / vnd verbie-
ten / das er auch kein erbe / widder haus noch hoff / noch einen
heller must von seinen eltern behalten / gewarten noch empfa-
hen / vnd wolt also seines eigens glaubens mit yhm spielen / bis
yhm der geist widder zu fleisch wurde / Denn weil er die eltern
nicht wissen noch glauben wolt / so must er auch yhr gut nicht
wissen noch glewen. O welch ein fein löblich regiment wurd
da ym der welt werden / da niemand des andern kind / bruder /
schwester / vetter / freund / erbe noch nachbar sein wollt / Nicht
bessers / denn vnter die wilden wolffe mit solchen Christen.

Item also wolt ich auch keinen fursten noch herrn vnter-
than sein / vnd surgeben / Ich wusste nicht / ob er furst geporen
B were /

were/ weil ichs nicht gesehen hette/ sondern den leuten glauben
musste/ Vnd wolt also abermal ein frey gesell sein/ Gottes gebot
auffheben/ vnd keine oberkeit haben/ Sondern von leuten vn-
ter die wolffe lauffen/ da solch gebot Gottes von eltern vnd
oberkeit zu ehren/ nichts golten. Vnd zwar/ das der teuffel ym
diesen teufflern solchs gerne wolte/ scheint wol an dem/ das
solche teuffler schon bereit (als man sagt) weib vnd kind/ haus
vnd hoff verlassen/ vnd schlechts alleine gen hymel wollen/
Dauon hernach mehr.

Ja ich wolt auch wol sagen/ die heilige schrift were nichts/
Christus were nichts/ Die Aposteln hetten auch nie gepredigt/
Denn solchs alles habe ich nicht gesehen noch gesulet/ sondern
von menschen habe ichs gehört/ Darumb wolt ichs nicht glau-
ben/ es wurde denn alles von neuen/ fur meinen augen also ge-
macht/ gethan vnd gehandelt/ So were ich denn aller erst ein
rechter frey gesell/ auch von allen Gottes geboten. Da wolt ich
hin/ spricht der teuffel/ wenn ich kundte/ Das heist ein grund
gelegt der widder tauffe/ auff das nichts bliebe/ widder ym hy-
mel noch auff erden.

So sprichstu / Hastu doch selbs geleret/ man solle allein
Gott/ vnd nicht menschen glauben/ Trawen/ mit der weise solte
stu mich wol mit meinem eigen schwerd schlagen. Weil du aber
ia so zenckisch bist/ So frage ich widder/ ob man Gott auch
solle gehorsam sein/ da er die eltern vnd oberherrn gebeut zu
ehren? Sagestu/ Ja/ So antwort ich/ Wie weistu denn/ wel-
che sie sind/ wo du menschen gar nicht glauben wilt? Wie ste-
hestu nu? Es mangelt dir daran/ (sehe ich wol) das du nicht
wilt verstehen/ was menschen glauben heist/ vnd plumpst so
hinein/ wie die schwermer pflegen/ Darumb höre zu.

Wenn man leret/ das wir nicht sollen den menschen glau-
ben/ so

ben/so meinet man freilich/das sie allein menschen für sich/vnd
nicht Gott bey yhn sey/das ist/das sie reden/als menschen von
yhn selbst/on Gottes wort vnd werck/was sie ertichten/vnd
können solchs widder mit Gottes Worten noch wercken beweisen/
Denn wer wolt das menschen lere heissen/die von Gott
durch menschen wird fürgetragen? Vnd wer wolt auch sagen/
das solch glauben an solche lere/hiesse an menschen vnd
nicht an Gott geglaubet? Denn darumb schilt Sanct Paulus
die menschen lere/Colloss. ij. das sie nie gesehen habe/was
sie leret/das ist/Es ist erticht was sie sagt/Es ans auch nicht beweisen
mit einigem wort odder werck Gottes. Darumb wenn
du hörest/das man menschen nicht solle glauben/so mustu es
verstehen/das da kein Gottes wort noch werck angezeigt noch
beweiset wird/sondern ist ein lauter menschen geticht/auff das
du einfeltiglich/(wie die wort lauten)menschen glauben schei-
dest/widder Gott glauben.

¶ Tu sihe/wenn du geboren wirst/das gehet nicht heimlich
zu/wird auch nicht von menschen ertichtet/Sondern es ist
Gottes werck/das öffentlich an tag kompt/vnd kein mensch
widderprechen kan/Vnd obs yemand widderprechen wolt/
wie die Juden sich widder Christus wunderzeichen vnterstun-
den/so hats doch keinen bestand/Denn es werden doch die an-
dern obligen/so das Göttlich öffentlich werck sehen vnd zeu-
gen/vnd den andern das maul/mit der that vnd warheit stop-
ffen/Denn Gottes ordnung hie starck gehet/das ynn zwey
oddere dreyer zeugen mund bestehen alle sachen. Sihe/solchen
leuten mus man warlich glauben/Denn sie zeigen das werck
Gottes/nemlich/deine geburt/Vnd beweisen/das es von dei-
nen eltern kome/dazu so nympt sich dein niemand an/denn
deine eltern/sicht vnd erbeit auch niemand für dich/on sie al-
leine/Vnd gehen also Gottes werck so öffentlich/das sie nie-
mand widderficht/auch kein teuffel noch mensch/Sondern

B ij yederman

yederman so gewis weis vnd bekennet/ als er bekennet/ das du lebest.

Sihe/ das heist/ nicht menschen/ sondern Gott glexben/ denn man dir Gottes werck zeuget. Vnd Summa/ Wo man dir Gottes werck zeiget vnd zeuget/ vnd nicht von menschen er- tichtet ist/ vnd dazu widder vom teuffel noch menschen widder sprochen wird/ da glexbestu Gott vnd nicht menschen/ Denn es ist Gottes werck/ das er so offentlich dar stellet/ das auch der teuffel nicht da widder kan.

Das aber etliche kinder werden zu weilen verthan vnd weg geschickt / vnd yhr eltern nicht gewis kennen yhr lebens lang/ Das gibt diesen sachen nichts zu schaffen/ Denn wir reden hie von gemeiner Göttlicher offentlicher ordnung. Solche kin- der aber werden vnredlich heimlich vnd widder Gottes ord- nung gezeuget/ darumb ist's nicht wunder/ obs auch anders mit yhn zu gehe/ Vnd wie sie heimlich gezeuget werden/ also auch yhre heimliche eltern nicht kennen mugen/ Finsternis ist's/ fin- sternis mag's bleiben/ was der teuffel thut/ Aber Gottes ord- nung gehen ym liecht.

Wenn du mich nu fragest / Warumb ich glexbe/ das der man vnd die frawe meine eltern sind. So sage ich zu erst/ Ich bin gewis/ das ich ein Gottes werck vnd mensch bin/ vnd mus ia vater vnd mutter haben/ vnd bin nicht aus eym stein ge- sprungen/weil Gott Gene. i. spricht zu den menschen/ Wachst vnd mehret euch. Daraus man mus schliessen/ das alle mens- schen von man vnd weib komen/ das ist/ Vater vnd mutter ha- ben. Welchs er auch bestettigt mit seinem gebot/ da er sagt zu allen menschen/ Du solt vater vnd mutter ehren. (Christus ist billich dort vnd hie/ als Gottes son ausgenomen) Weil es nu gewis ist/ das ich menschen zu eltern habe / vnd nicht auffm barom gewachsen bin / So zwinget mich zum andern weiter/
das ich

Das ich glerobe/der man vnd die frawe sey es/ die mir von men
schen werden angezeigt/durch den spruch/ Inn zwey oder drey
er zeugen mund stehen alle sache. Da mit zwinget mich Gott/
solchen leuten zu glauben. Zum dritten/ ist das werck Gottes
auch da/ das sich niemands yn seinem namen mein/ als eins na
turlichē kinds annimpt/ yn aller welt/ den diese zwey menschen/
odder yn yhrem namen (so sie tod sind) die freunde odder frume
leute/ Vnd solchs alles vnwiddersochten bleibt von teuffel vnd
menschen/ wie ein ander offentlich Gottes werck/ Denn offent
liche Gottes werck kan widder welt noch teuffel anfechten/
Vnd ob sie sichs vnterstunden/ ist nichts. Aber Gottes wort
(weil das werck noch verborgen ist) das kan er meisterlich an
fechten.

Also das ich glerobe/ der man sey mein furst odder herr/ ist
erstlich die ursache/ Gottes wort spricht Ro. xij. Vderman sey
der oberkeit vnterthan. Drausich neme/ das ich mus einen ober
hern haben vnd vnterthan sein. Zum andern/ weil alle welt
zeugt vnd sagt/ dieser sey es/ vnd yederman hellt yhn dafur/
vnd niemand widderpricht/ als ein offentlich werck Gottes/
so mus ich glauben solchen zeugen. Vnd obs yemand widder
spreche/ so bestehets doch nicht/ yederman spricht doch zu letzt/
Er leuget. Zum dritten/ ist das offentlich werck Gottes da/ das
sich mein sonst niemand/ als zum vnterthan annimpt/ Ich lebe
vnter seinem schutz/ schirm/ recht vñ fride/ wie es sein vnd gehen
sol vnter der oberkeit/ vnd lest mich alle ander oberkeit sitzen/
vnd sicht mich daryn nicht an/ widderpricht auch nicht/ Wo
ich anders ym liecht mit recht vnd Gottlicher ordnung da sitze/
Denn reuber vnd mörder mugen heimlich vnd finster yn fremb
der hirschaft sitzen/ Aber man spricht sie warlich an/ als die
nicht vnterthan daselbst sind.

Harre (sprichstu) da wil ich dir eines geben. Warumb glaub
stu denn nu nicht/ das der Papst dein herr sey? sondern machst
den Endechrist draus/ so doch alle welt zeuget/ er sey das heubt

B ij der Christens

der Christenheit/ vnd beweisen dirs auch mit der that/ denn er
sitz ia ym regiment. Antwort / Da hettestu mich schier er-
schnapt/ Aber las dir sage/ Wenn du diese drey stuck mir kanst
am Bapstum zeigen/ die ich dir an den eltern vñ oberkeit zeige/
so wil ich das Bapstum fur ein Gottes werck halten vnd gere-
ne gehorsam sein/ vnd dem werck Gottes gleroben/ Kanstu
aber das nicht thun/ lieber/ so las mirs ein menschē geticht sein/
on Gottes wort vnd werck / dem aller ding nicht zu gleroben
ist. Das aber ein menschen geticht sey/ wil ich beweisen mecht-
tiglich.

Erstlich/ sagt mir Gottes wort wol/ das eltern vnd ober-
keit seien/ vnd ich solle vnd müsse eltern vnd oberkeit haben/
wie gehort ist/ Aber kein Gottes wort ist/ das da sage/ das ein
Bapst sey/ vnd ich müsse einen Bapst haben/ oder dem Bapst
unterthan sein. Weil aber die schrift nichts vom Bapst odder
von seinem regiment gepent/ so ist auch kein Bapstum/ das ein
Göttlich werck sey/ Sintemal die schrift von Gottes wercken
zeugnis gibt/ Darumb ich droben gesagt habe/ Menschen sol
man gleroben / wo sie nicht yhr geticht odder werck/ sondern
Gottes wort oder werck zeugen vnd zeigen/ Denn/ Ante questio-
nem/ quid est/ oportet questionem/ si est/ definire. Ehe man
mich leret/ wer der Bapst sey/ mus man mich zuvor gewis ma-
chen/ das ein Bapst sey mit Göttlichem recht / Wenn er aber
nicht sein kan/ so fragt man nicht darnach/ wer er sey. Zum
andern/ ob wol viel menschen von yhm zuegen / So ist doch
solch zeugen nicht allein vergeblich/ weil es kein Gottes werck
aus dem Bapstum machen noch beweisen kan/ sondern auch
nicht völlig vnd gantz/ Denn es haben bis her da widder gezeu-
get vnd widderprochen/ nicht alleine die ganze Christenheit
gegen morgen / sondern auch viel unterthanen des Bapsts
selbs/ die druber verbrand sind/ vnd noch teglich erwurget wer-
den/ das also solch regiment noch nie ist angenommen vnd vñ
widderprochen blieben/ odder zum rugigen stand komen/
wie der

wie der eltern vnd ōberkeit regiment / als droben erzelet ist.

Zum dritten / ist auch kein Gottes werck da / Denn er thut kein ampt seinen vnterthanen zu nutz / Ja er verfolget das Euangelion vnd die Christen / Schweige das ers solt leren vnd handhaben / Er leret wol seinen dreck vnd giff / als die menschen lere / lest das Euangelion vnter der bancf liegen / ia er verfolget / wie woles yhn nichts hilfft / Er macht aus dem sacrament / opffer / aus den wercken / glaupe / aus dem glauben / werck / verbent ehe / speise / zeit / Kleider vnd stete / Vnd verkeret / misbraucht alle Christliche guter / zu schaden der seelen / wie wir solches alles anders wo gnugsam beweiset haben. Weil denn alle drey stücke ym Bapstum mangeln / so mus mans für lauter menschen geticht halten / dem gar nichts zu gleuben ist / vnd yn keinen weg der eltern vnd ōberkeit stand zu vergleichen.

Also hie auch / die tauffe ist ein werck Gottes / das kein mensch ertichtet / sondern Gott befolhen vnd bezeuget hat yn Euangelio. Zum andern / sind leute die solchs von dir zeugen / das du getaufft seyest / vnd niemant widder sprichets / noch beweiset das widder spiel. Zum dritten folget das werck / das man dich yn der Christen zal rechnet / lest dich zum Sacrament vnd allem Christlichem recht kōmen / vnd des alles gebrauchen / Welches man nicht thet / wo du nicht getaufft werest / vnd nicht yederman solchs gewis were / welchs alles auch eitel zengnis sind deiner tauffe / Denn alle welt weis vnd sibet / das man yderman teuffet / weil er ein kind ist. Wer nu diesem allem nicht gleuben wolt / der thet eben so viel / als gleubet er Gott selber nicht / weil Gott selber spricht / Zweyen zeugen sol man gleuben. Vnd strafft auch solche zeugen nymer mehr / der doch keine falsche zeugen vngestraft vnd vngeschendet lest.

Hie mit / halt ich / sey gnug beweiset / das keiner muge an
seiner

seiner tauffe zweineln/ als wisse er sie nicht/ Vñ das der sundigt
an Got/ wers nicht gleroben wolt/ Denn er ist viel gewisser sei-
ner tauffe/ durch der Christen zeugnis/ denn ob er sie selber gese-
hen hette/ weil der teuffel leichtlich yhn kund yrrre machen ym
kopff/ das er dechte/ Er were ym trawm odder gespenst/ vnd
nicht recht getaufft/ Vnd muste dennoch zu letzt an der Chris-
ten zeugnis sich halten vnd zu ruge stellen/ Welch zeugnis der
teuffel nicht also kan yrrre odder zweinelhafftig machen.

Auffs dritte/ sagt man/ welchs ich denn auch gelesen habe/
das sie sich grunden auff diesen spruch/ Wer da glerobt/ vnd
getaufft wird/ der sol selig werden. Aus dem wollen sie nemen/
das man niemand teuffen solle/ er glerobe dem zuuor. Wie sa-
ge ich/ das sie sich gar grosser vermessenheit vnterwinden/
Denn wo sie solcher meinung folgen wollen/ so müssen sie nicht
ehe teuffen/ sie wissen denn gewis/ das der tauffling glerobe/
Wie vnd wenn wollen sie doch das ymer mehr wissen? Sind
sie nu zu Götter worden/ das sie den leuten yns hertz sehen kon-
nen/ ob sie gleroben odder nicht? Wissen sie nu nicht/ ob sie
gleroben/ warumb teuffen sie denn/ weil sie ia so hart fechten/
der glawbe mus fur der tauffe sein. Thun sie nicht sein hie wid-
der sich selbs? das sie teuffen/ da sie nicht wissen/ ob glawbe da
sey odder nicht/ Denn wer die tauffe auff den glawben grun-
det/ vnd teufft auff ebentheur/ vnd nicht gewis ist/ ob glawbe
da sey/ der thut nichts bessers/ denn der on glawbe teuffet/ Denn
onglawbe vnd ungewisser glawbe/ ist gleich viel/ vnd ist alles
beides widder diesen spruch (Wer da glerobt) welcher redet
von gewissem glawbe/ den der tauffling haben sol.

Ja sprichstu/ Er bekennet/ das er glerobe ic. Lieber las be-
kennen hin vnd her/ Der Text spricht nicht/ Wer da bekennet/
sondern wer da glerobt. Sein bekentnis hastu wol/ noch weistu
seinen glawben nicht/ Vnd kanst damit deinem verstand nach
diesem

diesem spruch noch nicht genug thun/ du weissest denn auch seinen glauben/ weil alle menschen lugener sind/ vnd allein Gott die hertzen kennet/ Drumw wer die tauffe wil grunden auff den glauben der taufflinge/ der mus nymer mehr kein mensch teuffen/ Denn wenn du gleich einen menschen hundert mal teuffest eintag/ dennoch weistu kein mal/ ob er gleube. Was treibestu denn mit deinem widderteuffen/ weil du widder dich selbst thust/ vñ teuffest/ da du keinen glauben gewis weist/ Vnd lereest doch/ der glawbe müsse gewis da sein. Also stehet dieser spruch (Wer da gleubt) gar starck/ widder yhre widdertauffe/ weil der spruch von gewissem glawben redet/ vnd sie yhre widdertauffe auff vngewissen glawben grunden/ vnd thun nicht einen buchstabennach dem spruch.

Eben also rede ich auch vom taufflinge/ wo er die tauffe auff seinen glawben grundet odder empfehet/ Denn er ist seines glawbeus auch nicht gewis. Denn ich setze gleich/ das sich ein man heute lasse widderteuffen/ als der sich dünckt vnd anfechten lest/ er habe nicht gegleubt ynn der kindheit/ Wolan/ wenn morgen der teuffel kompt/ sicht sein hertz an/ vñ spricht/ Awe/ izt suleich erst rechten glawben/ gestern habe ich warlich nicht recht gegleubt. Wolauff/ ich mus mich abermal zum dritten teuffen lassen/ vnd mus also die ander tauffe auch nichts werden. Meistu der teuffel könne solchs nichts? Ja lerne yhn das kennen/ Er kan wol mehr/ lieber freund. Weiter/ wenn er nu also auch die dritten tauffe anfechte/ Item also fort an die vierde/ on alles auffhören (wie er denn auch ynn synn hat zu thun) gleich wie er mir vnd vielen gethan hat/ mit der beichte/ da wir auch einerley sünde nymer mehr kundten genug beichten/ vnd ymer eine Absolution nach der ander/ einen beichtvater vber den andern suchten on alle ruge vnd auffhören/ Darumb das wir auff vnser beichten vns grunden wolten/ Gleich wie sich izt die teufflinge auff yhren glawben grunden

C

grunden

grunden/ Was solte wol draus werden? Ein ewiges tenffen
vnd kein auffhören wurde draus. Darumb ist nichts/ Es kan
widder tauffer noch tauffling die tauffe auff den glauben ge-
wis grunden/ Vnd ist also dieser spruch gar viel stercker wid-
der sie denn widder vns. Vnd das sind sie/ die nicht wollen
den menschen glauben/ die da zeugen sind yhrer tauffe/ vnd hie
glauben sie yhn selbs/ als menschen/ das sie getaufft seien/ ge-
rade als weren sie nicht menschen/ odder als weren sie yhres
glaubens gewisser/ denn das zeugnis der Christenheit ist.

Darumb schliesse ich widder sie / wollen sie diesem spruch
(Wer da glaubt) gung thun/ yhrem verstand nach/ so müssen
sie die widdertauffe viel mehr verdamnen/ denn die erste/ Vnd
kan widder tauffer noch tauffling bestehen mit seiner mei-
nung/ Denn sie alle beide des glaubens ungewis sind/ odder
yhe zum wenigsten ym der fahr vnd anfechtung stehen/ Denn
es kompt/ ia es gehet also zu mit dem glauben/ das oft der/ so
da meinet/ er glaube/ nichts vberall glaube/ vnd widderumb/
der da meinet/ er glaube nichts/ sondern verzweinele/ am aller
meisten glaube / So zwinget dieser spruch (Wer da glaubt)
vns nicht/ zu wissen wer da glaube odder nicht/ sondern stellet
yederman heym ym sein gewissen/ wolle er selig werden so mus-
se er glauben vnd nicht heuchlen/ als wolt er an der tauffe
gung haben/ das er Christen sey/ Denn er spricht nicht/ Wer da
weis/ das er glaubt/ odder wenn du weist/ das ihener glaubt/
Sondern/ Wer da glaubt/ wers hat der hats. Glauben mus
man/ Aber wir sollen noch könnens nicht gewis wissen.

Weil denn vnser tauffe solche von anfang der Christenheit
gewesen vnd gehalten ist/ das man Kinder tauffte/ Vnd nie-
mand mit gutem gewissen gründe kan beweisen/ das da kein
glaube sey gewesen/ So solt man ia solchs nicht endern/ vñ auff
so ungewissen grund bawen/ Denn was man endern odder stor-
zen wil

zen wil/ so von alters her ist gebraucht/ das sol vnd nuns man
bestendiglich beweisen/ das widder Gottes wort sey/ Sonst/
was nicht widder vns ist/ das ist fur vns (spricht Christus)
Gleich wie wir kloster vnd Messeren vnd der geistlichen keus
cheit/ auch gestossen haben/ Aber also/ das wir die hellen gewis
ssen schrift angezeigt/ da widder sie sind / Denn wo wir dassel
bige nicht gethan hetten/ so müssen wir sie warlich lassen ste
hen/ wie sie bis her sind gestanden.

Denn das sie sagen/ Die Kinder können nicht glauben/ wo
mit wollen sie das gewis machen? Wo ist da schrift/ damit
sie solchs beweisen vñ drauff sie sich müge gründen? Es dünckt
sie wol/ weil die Kinder nicht reden noch vernunft haben/ Aber
der dünckel ist ungewis/ ia aller dinge falsch/ vnd ist auff vnser
dünckel nicht zu bauen.

Wir aber haben schrift/ das Kinder wol mügen vnd kön
nen glauben/ wenn sie gleich widder sprache noch vernunft ha
ben/ Als die schrift sagt/ psalm. 72. wie die Juden yhre sone
vnd tochter den götzen opfferten/ vnd vergossen also das vn
schuldige blut. Ists vnschuldig blut gewesen (wie der Text
spricht) so sind sie freilich rein vnd heilige Kinder gewesen/ welchs
sie nicht on geist vnd glauben haben mügen sein. Item/ die vn
schuldigen kindlin/ so Herodes erwurgen lies/ sind auch Kinder
gewest/ nicht vber zwey iar/ freilich on sprache vnd vernunft/
noch sind sie heilig vnd selig. Vnd Christus spricht Mat. xvij.
Das hymel reich sey der kindlin. Vnd S. Johannes ym mut
ter leibe war ein kind/ ich meine aber ia/ das er glauben kund.

Ja sprichstu/ mit Johannes war es ein besonders/ Aber
damit ist nicht beweiset/ das alle getauffte Kinder glauben kön
nen. Antwort/ Harre doch/ las dir der weile/ Ich bin noch
nicht da/ das ich der Kinder glauben beweise/ Sondern da/ das
ich beweise/ wie dein widderteuffens grund falsch vnd ungewis
C ij sey/ als

sey/ als das der nicht kan beweisen/ das kein glaube ynn kindern
sein muge/ Denn weil ynn Johanne glauben ist/ on sprache
vnd vernunft/ so bestehet dein grund nicht/ da du sagest/ Kin-
der mügen nicht glewen. Es ist ia nicht widder die schrift/
das ein kind glewe/ wie S. Johannes Exempel zeigt. Wenn
es nu nicht widder die schrift ist / das kinder glewen/ sondern
der schrift gemes/ So mus dein grund widder die schrift sein/
das kinder nicht glewen mügen / das wolt ich auff's erst.

Wer hat dich denn nu gewis gemacht/ das die getaufften
kinder nicht glewen/ so ich hie mit beweise/ das sie mügen gleu-
ben? Bistu aber vngewis / warumb bistu denn so künne/ vnd
machst die erste tauffe zu nicht/ da du nicht weißt noch wissen
kanst/ das sie nichts sey? Wie? wenn alle kinder bey der tauffe
nicht allein glewen künden/ sondern auch so wol glewben/
als Johannes ynn mutter leibe? Denn wir können ia nicht
leucken/ das eben der selbige Christus/ bey der tauffe vnd yn der
tauffe ist/ Ja er ist der teuffel selbs/ der dort ynn mutter leibe zu
Johanne kam / So redet er auch eben so wol bey der tauffe
durch des priesters mund/ als er dort durch seiner mutter mund
redet. Weil er denn da ist gegenwertig/ redet vnd teufft selbs/
warumb solt nicht auch der glaube vnd geist/ durch sein reden
vnd teuffen/ so wol ynn das kind komen/ als er dort ynn Jo-
hannem kam? Ists doch einerley redener vnd thetter dort vnd
hie. Vnd zumor aus/ weil er spricht durch Isaiam/ Sein wort
solle nicht leer widder komen. Tu bringe du auch einen
einigen spruch/ der da beweise/ das die kinder nicht glewen
können ynn der tauffe/ weil ich so viel auff bringe/ das sie gleu-
ben können/ vnd billich zu halten sey/ das sie glewen/ wie wol
vns vnberust ist/ wie sie glewen odder wie der glaube gethan
sey/ Da ligt auch nicht an.

Zu dem heist er vns die kindlin zu sich bringen Matth. xix.
herzt

hertz vnd küffet sie/ vnd spricht/ Das hymel reich sey yhr. Wie
wol hie widder sich die geister gerne wolten sperren/ vnd sa-
gen/ Christus rede nicht von kindlin/ sondern von den demütig-
gen/ Aber es klinget nicht/ weil der Text gar klerlich saget/ man
habe yhm kindlin/ nicht die demütigen zu bracht/ Vnd Chri-
stus nicht spricht/ Last die demütigen/ sondern die kindlin zu
mir komen/ vnd schalt die iünger nicht darumb / das sie den de-
mütigen/ sondern den kindlin wereten / Vnd hertzet auch nicht
noch segenet die demütigen/ sondern die kindlin/ darnumb wenn
er sagt/ Solcher ist das hymel reich. Vnd Matth. xvij. Ihr
engel sehen meins vaters angesicht/ mus auch von den selbigen
kindlin zu verstehen sein/ Denner auch darnach leret/ wir sol-
len auch solche kindlin werden. Wo aber solche kindlin nicht
heilig weren/ hette er vns warlich ein böse fürbilde geben/ dem
wir gleich solten werden/ Vnd solte nicht sagen/ yhr must wie
die kindlin werden/ sondern viel mehr/ yhr musset anders/ denn
die kindlin sind/ werden. Summa/ Der schwarm geist kan ym
diesen text keine demut aus den kindern machē/ on nach seinem
düncfel/ die wort stehen zu gewaltig vnd zu klar da für augen.

Etlich aber wollen diesen text also matten/ das der Juden
kinder beschnitten waren/ darumb mochten sie wol heilig sein
vñ zu Christo bracht werden/ Aber vnser kinder sind heiden etc.
Antwort/ Wie wenn auch meidlin vnter den kindlin gewesen
weren/ die man zu Christo bracht & welche ia nicht beschnitten
waren/ Denn sie freilich allerley kindlin zu yhm bracht haben/
Vnd weil nicht die kneblin allein daselbst sind ausgedruckt/ so
konnen wir die meidlin nicht ausschliessen / sondern mussens
lassen kindlin sein/ beide meidlin vnd kneblin/ Vnd das sie
nicht allein vmb der beschneitung willen/ sondern auch vmb
des willen/ das sie nu zu Christo komen aus dem alten yns newe
Testament/ selig heissen/ wie sein wort laut/ Last die kindlin zu
mir komen/ denn solcher ist das reich Gottes. Solcher kindlin
C ij spricht

(spricht er) so zu mir komen/ ist das reich Gottes/ Denn durchs
brennen vnd komen zu Christo / werden sie so selig/ das er sie
herzet/ segenet vnd das reich gibt. Darumb las ich schwermen/
wer da wil/ Ich halte noch/ wie ich ynn der Postill auch ges
schrieben habe/ das die aller sicherste tauffe/ sey der Kinder tau
ffe/ Denn ein alter mensch mag triegen/ vnd als ein Judas zu
Christo komen vnd sich teuffen lassen/ Aber ein kind kan nicht
triegen/ vnd kompt zu Christo ynn der tauffe/ wie Johannes zu
yhm kam/ vnd wie die kindlin zu yhm bracht worden/ das sein
wort vnd werck vber sie gehe/ rure vñ mache sie also heilig/ weil
sein wort vnd werck nicht kan vmb sonst gehen/ vnd gehet doch
hie alleine auffs kind/ Wo es des feilen solte/ so musste es gar fei
len vnd vmb sonst sein/ welches ist vnnützlich.

So kan man das auch nicht lencken/ das es meidlin sind ge
west vnd vnbescnitten/ da Psalm. lxxvij. von sagt/ das sie yhre
töchter opfferten den gözen Canaan/ vnd heist sie doch vnschul
dig blut. So hat warlich Mose Leuit. xij. auch die meidlin be
solhen Gotte zu opffern/ reinigen vnd losen/ Vnd ist wol schein/
das die kneblin haben die beschneitung alleine erlitten/ aber die
meidlin dennoch der selbigen auch mit genossen/ ynn Krafft des
spruches/ so Got sagt zu Abraham Gen. xvij. Ich wil deines sa
mens Gott sein/ vnd die beschneitung sol ein bund sein zwischen
mir vnd dir/ vnd deinem samem nach dir. Tu sind warlich die
meidlin auch Abrahams samem / vnd Gott ist durch solchen
spruch ebenso wol yhr Got/ ob sie gleich nicht beschnitten sind/
als der kneblin.

Gleubten sie nu / das Gott durch der beschneitung bund/
beide kneblin vnd meidlin annimpt vnd yhr Gott ist / War
umb solt er denn auch nicht vnser Kinder / durch der tauffen
bund annemen/ so er sich auch vns verheissen hat/ das er wil/
nicht allein der Juden/ sondern auch der Heiden Gott sein/
Roma.

Roma. iij. sonderlich der Christen vnd gleybigen / Hilfft dort die beschneitung der kneblin / beide kneblin vnd meidlin / das sie Gottes volck werden / vmb Abrahams glawben willen / von dem sie komen / wie viel mehr sol hie die tauffe / eins iglichens besonders helfen / das sie Gottes volck werden / vmb Christus verdienst willen / zu dem sie bracht / vnd von yhm gesegnet werden. Das sage ich alles / das der widderteuffer grund vngewis ist / vnd sie gar freuelich drauff bauen.

Ja sprichstu / Er hat die kinder nicht heissen teuffen / so find man des kein Exempel ym der Apostel schrifften odder Episteln. Antwort / Er hat auch keine alten / noch man noch weib / noch yemand ym sonderheit heissen tauffen / so wollen wir niemand teuffen. Er hat aber heissen alle Heiden teuffen / keinen ausgeschlossen / da er sagt / Gehet hin / leret alle Heiden vnd teuffet sie ym meinem namen ꝛc. Matth. vlti. Nu sind die kinder auch ein gros stücke der heiden / So lesen wir yn der Apostel geschicht vnd S. Paulus Episteln / wie sie ganze heuser getaufft haben / Aber die kinder sind warlich auch der heuser ein gut stücke / Das es scheint / gleich wie yhn Christus on alle vnterscheid befielt / alle Heiden zu leren vnd teuffen / Also haben sie auch gethan vnd ym den heusern alles getaufft / was drinnen gewesen ist / Haben sich nicht versehen / das die Rotten geister wurden vnterscheid suchen zwischen iung vnd alt / Weil sie sonst ym allen Episteln so viel schreiben / das kein ansehen noch vnterscheid der person vnter den Christen sind / sie hetten sonst solchs alles vberkomen vnd ausgedruckt / Denn S. Johannes. i. Jo. ij. auch den kindlin schreibt / das sie den vater kennen. Vnd freilich die kinder tauffe von den Aposteln komen ist / wie S. Augu. auch schreibt / Derhalben die teuffler aller ding ferlich handeln / das sie nicht allein yhres dinges vngewis sind / sondern auch widder solche eingefurte spruche handeln / vnd vnterscheid der person ertichten aus eignem kopff / da sie Gott nicht gemacht hat /

macht hat/ Denn ob sie gleich vermeineten/ das sie nicht gnug
sam dadurch vberwunden wurden/ so müssen sie dennoch/ wie
zenckisch sie sind/ sich zum wenigsten da für entsetzen/ vnd eine
sorge kriegen/ das sie vnrecht thun/ vnd auff vngewisse grunde
sich widder teuffen/ Wenn sie aber vngewis sind/ so ist schon
beschlossen/ das sie vnrecht thun/ Denn ynn Göttlichen sachen
sol man nicht des vngewissen/ sondern des gewissen spielen.

Denn so ein widdertaufer höret/ (der nicht halstarrig/
sondern gelerig sein wil) das/ gleich wie Johannes ist glewbig
vnd heilig worden/ da Christus kam vnd durch seiner mutter
mund redet/ also werde das kind auch glewbig/ wenn Christus
ynn der tauffe zu yhm/ durchs teuffers mund redet/ weil es sein
wort/ sein gepot ist/ Vnd sein wort nicht kan vmb sonst gehen.
So mus dennoch der widder teuffer sagen/ Es mocht warlich
sein/ vnd kans nicht ganz vnd bestendiglich leucken/ noch
schriffte da widder auffbringen. Kan ers aber nicht bestendig-
lich vnd mit gutem grunde leucken/ so kan er auch seine widder-
tauffe nicht bestendiglich erhalten// Denn er mus zuvor besten-
diglich beweisen/ das die kinder on glawbe getaufft werden/ sol
er das widder teuffen bekrefstigen. Also meine ich/ sey gnug be-
weist/ das yhr grund vngewis vnd lauter vermessenheit sey.

Wolan/ ich setze gleich/ das sie aller dinge künden gewis
machen/ das die kinder on glauben sind yn der tauffe/ wolt ich
doch gerne wissen/ aus was grund sie wolten beweisen/ das sie
vmb des willen widder zu teuffen sein solten/ wenn sie hernach
glewbig odder bekennend des glawbens werden? Denn es ist
nicht gnug/ das sie sagen/ Sie sind on glawben getaufft/ drum
sind sie widder zu teuffen. Sie müssen vrsachen geben/ Es ist
ein vnrechte tauffe sprichstu. Was ligt daran/ dennoch ist eine
tauffe/ Ja es ist eine rechte tauffe an yhr selbs/ on das sie vn-
recht empfangen/ Denn es sind die wort gesprochen vnd alles
gethan

gethan/was zur tauffe gehöret/so völig/ als geschicht/ wenn
der glawbe da were. Wenn nu ein ding an yhm selbs recht ist/ so
mus darumb nicht anders vernewet werden/ obs gleich vnrecht
empfangē ist/ Manthu das vnrecht ab/ so wirs alles recht/on
alle vernewerung / Abusus non tollit substantiam / imo con-
firmat substantiam. Misbrauch endert keinem ding sein we-
sen/ia on wesen kan kein misbrauch sein.

Wenn nu der glawbe vber zehen iar nach der tauffe keme/
warumb solt man doch widderumb teuffen/ so nu der tauff als
ler ding ist genug geschehen/ vnd alles recht worden? Denn
er glerbt nu/wie die tauffe foddert. Ist doch der glawbe nicht
vmb der tauffe willen/sondern die tauffe vmb glawbens wil-
len. Wenn nu der glawbe kompt/so hat die tauffe das yhr/vnd
ist die widdertauffe vergeblich.

Gleich als wenn eine magd einen man neme/ mit vnwil-
len vnd ganz on ehlichs hertz gegen dem man / Die ist freilich
fur Gott nicht sein ehlich weib. Nu vber zwey iar gewönne sie
yhn ehlich lieb/solte man hie auch widderumb new verlöbnis/
new vertrawung vnd newe hochzeit anrichten/vnd fur geben/
sie were on ehliche trew sein weib worden/ darumb were die vo-
rige verlöbnis vnd hochzeit nichts? Man wurde freilich sa-
gen/du werest ein narre/ Sintemales hie nu alles schlecht we-
re/weil sie zu recht keme/ vnd den man/den sie vnrecht geno-
men hatte/ nu recht behelt. Item/ wenn ein alt mensch sich
felschlich teuffen liesse/ vnd vber ein iar glerbig wurde/ lieber
meinstu/das man solchen auch widderumb teuffen solte? Er
hat die rechte tauffe vnrecht empfangen / So höre ich wol/sein
vnrecht solt die tauffe vnrecht machen/ vnd solte menschlicher
misbrauch vnd bosheit stercker sein/ denn Gottes gute vnd
vnerstörliche ordnung? Gott macht einen bund mit dem
volck Israel auff dem berge Sinai/ Da haben etliche den sel-
bigen bund

D

bigen bund nicht recht vnd on glawben angenommen/ Wenn nu
hernach die selbigen zum glawben komen sind/ lieber solt der
bund darumb auch vnrecht sein gewesen/ vnd Gott musste eym
iglichen von newen auff den berg Sinai komen vnd den bund
widder vernewen?

Item/ Gott lest seine zehen gebot predigen/ Aber weil die
selbigen etliche allein mit den ohren fassen/ aller ding vnrecht/
so sind es nicht zehen gepot/ tügen auch nichts/ Vnd Gott mus
ste hinfurt andere newe zehen gebot geben/ an stat der vorigen/
vnd musste nicht gnug sein/ das die leute sich recht bekereten/
vnd die vorigen zehen gebot hielten. Da wurde mir ein seltsam
wesen aus/ das Gottes wort/ so ewiglich bleibt / musste so oft
verwandelt vñ ein neues werden/ so oft die menschen sich wan
deln vnd new werden/ So es doch darumb bestendig vnd einig
bleibt/ auff das die/ so itzt nicht dran hangē oder dauon fallen/
einen gewissen bestendigen fels haben widder zu keren vnd sich
dran zu halten. Wenn vntersassen yhrem herrn hül deten/ der
meinung/ sie wolten yhn tödten/ vñ vber drey tage rewete sie es
vnd geben sich recht ym gehorsam von hertzen/ Lieber/ were
es hie auch not/ auffz newe vnd anders hül den? Klein zwar/
weil si in die hulde recht furen/ die sie doch felschlich gethan
hatten.

Wenn sie da hinaus wollen/ so werden wir zu teuffen
gnug kriegen alle stunde/ Denn ich wil den spruch (Wer da
glaubt) für mich nemen/ vnd wo ich einen Christen finde/ der
gefallen odder on glawben ist/ da wil ich sagen/ Dieser ist on
glawben/ darumb mus seine tauffe nichts sein/ vnd wil yhn wid
der teuffen/ Fellet er darnach abermal/ so wil ich abermal sa
gen/ Sihe/ der ist on glawben/ darumb ist seine vorige tauffe
nichts/ Er mus zum dritten mal auch getaufft werden/ Vnd
so fort an/ so oft er fellt odder zweifel ist/ ob er glaube/ wil ich
sagen/ Der glaubt nicht/ darumb ist seine tauffe nichts/ Er
mus

mus Kurtz vmb sich so lange lassen teuffen/ bis er nymer mehr
fallen odder on glawben sein könne / auff das er den spruch
(Wer da glewbt) gnug thue. Sage mir/ welcher Christ wil
dem ymer mehr gnugsam getaufft werden/ odder seiner tauffe
ein gewisende bekommen? Kan nu die tauffe recht vnd gnug
bleiben/ob der Christ tausent male in iar vom glawben siele/
odder sundigete/ Vnd ist gnug/das er selbs sich widder zu recht
kere/vnd glewbig werde/vnd nicht mus so oft widder getaufft
werden/Warumb solt nicht auch die erste tauffe gnug vñ recht
sein/ wenn der Christ hernach recht vnd glewbig wird? So
doch kein vnterscheid ist vnter der tauffe on glawben/sie sey fur
odder hernach on glawbe/so ists sie on glawbe/Ist sie on glaw
be/so mus man sie endern nach dem spruch (Wer da glewbt)
wie die widderteuffer narren.

Das sage ich darumb/ wenn die teuffer gleich yhr ding
kündten beweisen/das kinder on glawben sind / (als sie nicht
konnen) so hetten sie doch damit nichts mehr erstritten / denn
das die rechte tauffe/so von Gott eingesetzt ist/nicht recht/son
dern ym misbrauch empfangen ist. Wer aber nicht mehr denn
misbrauch beweiset/ der beweiset auch nicht mehr/ denn das
der misbrauch zu endern sey/vnd nicht des dinges wesen/Denn
misbrauch endert keins dinges wesen. Golt wird darumb nicht
stro/obs ein dieb stelet vnd misbraucht. Silber wird darumb
nicht papyr/ obs ein wucherer felschlich gewinnet. Weil denn
die widderteuffer allein den misbrauch der tauffe anzeigen/so
handeln sie widder Gott/natur vnd vernunft/das sie auch die
tauffe sampt dem misbrauch newen vnd endern/gleich wie alle
ketzer auch am Euangelio thun/weil sie das selbige falschlich
vernemen/vnd also ym misbrauch hören / faren sie zu/ vnd en
derns/vnd machen ein new Euangelion draus. Also/wo du die
widderteuffer hin kereft/ so thun sie vnrecht/lestern vnd schen
den Gottes ordnung/heissen es vnrechte tauffe / vmb der mens

D ij schen

ſchen vnrecht odder misbrauchs willen/ wie wol ſie auch ſolch vnrecht vnd misbrauch der menschen nicht können beweisen.

Es iſt aber ein werck teuffel bey yhn/ der gibt glawben für/ vnd meinet doch das werck/ vnd füret mit dem namen vnd ſchein des glawbens die arme leute/ auff trawen der werck/ Gleich wie vnter dem Papſtum vns geſchehen iſt/ da man vns zum Sacramente treib/ als zum werck des gehorſams/ vnd niemand dahin gieng/ das er den glawben ſpeiſen wolte/ ſondern/ wenn wir das Sacrament empfangen hatten/ ſo war es alles geſchehen vnd das werck volbracht. Also hie auch treiben dieſe widder teuffer auff das werck/ das die leute drauff trawen/ wenn ſie alſo getauft werden/ ſo ſey es recht vnd wol gethan/ Nach dem glawben fragen ſie ym der warheit nichts/ on das ſie yhn rühmen allein zum ſchein/ Denn wie droben geſagt/ wo ſie ſolten des glaubens zuvor gewis ſein/ muſten ſie nymer mehr keinen menſchē teuffen/ Vnd wo ſie nicht auff das werck trawetē/ oder den glauben mit ernſt ſuchten/ durfften ſie ſich nicht wider teuffen/ Sintemal yn der erſten tauſſe/ das ſelbig wort Gottes ein mal geſprochen/ noch ymer bleibt vnd ſtehet/ das ſie dran können hernach gleuben/ wenn ſie wollen/ vnd das waſſer auch vber ſie gegoffen / das ſie es auch hernach ym glawben faſſen mügen/ wenn ſie wollen / Denn ob ſie gleich hundert mal die wort wider ſprechen / ſo ſind es doch die ſelbigen wort/ ſo yn der erſten tauſſe geſprochen ſind/ Vnd nicht yhre krafft daher haben/ das ſie viel mal odder auff das neue geſprochen werden/ ſondern das ſie befolhen ſind zu ſprechen ein mal.

Denn das iſt des teuffels rechtes meiſter ſtuck eines/ das er die Chriſten von der gerechtikeit des glawbens/ auff die gerechtikeit der werck nöttiget/ wie er die Galater vnd Corinthier/ welche (als Sant Paulus ſchreibt) ſo gar fein glawbten
vnd

vnd recht lieffen ym Christo/ auch also auff die werck treib/
Also ist/da er sahe/ das die Deudschen durchs Euangelion/
Christum sein erkandten vnd recht glewbtē/da durch sie denn
auch gerecht fur Gott waren/feret er zu/vnd reisset sie von sol-
cher gerechtikeit/ als sey sie nichts/ vnd suret sie ym das wid-
derteuffen/ als ym eine bessere gerechtikeit/ Macht damit/
das sie die vorigen gerechtikeit verlencken/ als die vntüchtig-
ge/vnd auff eine falsche gerechtikeit fallen. Was solich sagen?
Wir Deudsē sind rechte Galater vnd bleiben Galater/ Denn
wer sich widderteuffen lest/ der widderrufft mit der that/ sei-
nen vorigen glawben vnd gerechtikeit/ vnd macht sie zu sun-
den vnd verdamlich/welchs ist greulich/ aller ding/ wie Sant
Paulus sagt/das die Galater von Christo abe sind/ ia Chri-
stum zum sunden diener machten/wo sie sich beschnitten.

Es thut aber der Satan solchs alles/ vmb vnser willen/
auff das er vnser lere verdecktig mache/ als die wir nicht recht
schaffen geist noch lere haben mugen/ weil wir nicht recht ge-
taufft sind. Aber an den fruchten kan man den barom kennen/
Denn wir noch nicht/widder ym Bapstum noch yn allen rot-
ten/ sehen solche menner/ die so gewaltiglich die schrift hand-
len vnd auslegen/ als auff vnser seiten sind/ von Gottes gnas-
den/welchs nicht der geringsten gaben des geistes eine ist. i. Co-
rinth. xij. So sehen wir wol bey yhn rechte fruchte des teuffels/
Nemlich/das etliche vmb der widdertauffe willen/ von weib
vnd kind/ von haus vnd hoff lauffen/ keine oberkeit haben
wollen/vnd so fortan/ So doch S. Paulus leret/wer die seinen
nicht versorget/hat den glawben verlencket/ vnd ist erger denn
ein Heide. i. Timo. vi. Vnd zum. i. Corin. vij. wil er auch nicht/
das ein glewbig gemalh/ sich vom unglewbigen scheide. Vnd
Christus auch die ehe vngescheiden haben wil/ on wo hurerey
ursache gibt. Vnser geist lest/ ia er heist allerley stende bleiben
vnd yn ehren halten/vnd ym friede den glawben durch die liebe
D ij vben/

vben/daraus kein auffrhur noch billiche Klage vber vnser lere
komen kan/wie wol die Papisten mit yhrem liegen alles vn-
gluck vnd schuld geben/ Aber das hat seinen richter/ auch yhr
eigen gewissen hie vnd dort.

Hie mit ist auch verlegt/das sie daneben fur geben/Die tau-
ffe sey nichts/weil der priester odder teuffer nicht geglewbt ha-
be/Denn ob gleich Sant Peter yemand teuffet/dennoch künde
niemand wissen/ob Sant Peter zu der selbigen stunde glewbet
odder zweimelt/Den es kan ia niemand sein hertze sehen. Sum-
ma/Solch stuck hat vorzeiten die Donatisten auch beweget/
das sie sich absonderten vnd widderteufften/ da sie sahen/wie
etliche prediger vnd teuffer vnheilig waren/ Vnd fiengen an/
die tauffe zu grunden auff menschen heilicheit/ Welche doch
Christus auff sein wort vnd gebot grundet. Ja es sicht auch
vnser schwermer an/die Sacraments feinde/Denn wie wol sie
furgeben/die warheit vnd schriffte zwingen sie/ so liegen sie doch/
Sondern das stößt sie (wie sie denn auch an etlichen orten her-
aus faren) ob einiglicher bube muge Christum yns brod brin-
gen/ gerade als were die ganze welt gewis vnd sicher/ da sie
selbs glewbig vnd eitel heilthum/vnd nicht/ia so grosse buben
weren fur Gott/ als die sind/ die sie so frenel richten vnd buben
schelten/vnd vergessen des balcken ynn yhrem auge.

Wir haltens aber dafur/ das/ so S. Johannes sich nicht
schemet von Caiphas Gottes wort zu hören/vnd rhumets da-
zu fur eine weissagung/ Vnd so Moses sampt dem volck Isra-
el des gottlosen Bileams weissagung annemen vnd fur Got-
tes wort halten. Item Sant Paulus die heidenische Poeten/
Araton vnd Epimeniden annimpt / vnd yhre spruche (als
Gottes wort) preiset. Vnd Christus die gottlosen Phariseer
auff Moses wil gehöret haben/ als die gottlosen lerer/ So sol-
len wir vns viel weniger ekel machen/ sondern Gott richten
lassen

lassen yhr böses leben/ vnd vns yhr Göttlich wort dennoch ge-
fallen lassen/ Denn sind sie böse/ so sind sie yhn selbs böse/ Leren
sie aber recht/ so leren sie vns recht. Also thetten die frumen
Magi auch Matthei. ij. Sie höreten Gottes wort aus der
schriffte Michée/ durch den mund Herodis des grewlichen Kö-
niges/ Welcher es forder aus den gottlosen hohen priestern vnd
schrifftegelerten höret. Voch zogen sie auff solch wort hin gen
Bethlehem/ vñ funden Christum/ Vnd hindert sie nichts vber
al/ das sie Gottes wort nicht/ denn allein durch Heroden den
mörder Christi höreten.

Müssen wir doch bekennen/ das die schwermer die schriffte
vnd Gottes wort haben ynn andern artickeln/ Vnd wer es von
yhn höret vnd glewbt/ der wird selig/ wie wol sie vnheilig/ Ke-
zer vnd lesterer Christi sind. Es ist nicht ein geringe gnade/ das
Gott sein wort auch durch böse buben vnd gottlosen gibt/ Ja
es ist etlicher massen ferlicher / wenn ers durch heilige leute
gibt/ denn so ers durch vnheilige gibt/ Darumb das die vnuer-
stendigen drauff fallen/ vnd hangen mehr an der menschen hei-
lichkeit/ denn an wort Gottes/ Dadurch geschicht denn grösser
ehre den menschen/ denn Gott vnd seinem wort/ welche fahr
nicht ist/ wo Judas/ Caiphas vnd Herodes predigen/ wie wol
damit niemand entschuldigt ist yn seinem bösen leben/ ob Gott
desselbigen wol brauchen kan. Kan nu ein gottloser das recht
Gottes wort haben vnd leren/ so kan er auch viel mehr recht
teuffen vnd Sacrament geben/ Sintemal es grösser ist/ Got-
tes wort leren/ denn teuffen/ wie Sant Paulus rhümet 1. Cor. 1.
Vnd wie gesagt ist/ Wer nicht ehe wil von der tauffe halten/ er
wisse denn/ das der teuffer glewbe/ der mus nymer mehr von
keiner tauffe halten/ Denn so ich frage/ Bistu widder getaufft?
Ja. Wie weistu/ das du nu recht getaufft bist? Wiltu hie ant-
worten/ das dein teuffer sey glewbig gewesen? So frage ich/ wie
weistu es? Hastu sein hertz gesehen? So stehestu denn/ wie
butter an der sonnen.

So ist

So ist un vnsere tauffen grund der aller sterckest vnd si-
cherst/ Das Gott hat einen bund gemacht mit aller welt/ zu
sein der Heiden Gott ynn aller welt / wie das Euangelion
sagt/ Das Christus hat befolhen ynn alle welt das Euanges-
lion zu predigen/ als auch die Propheten manchfeltiglich ha-
ben verkündigt. Vnd zum zeichen dieses bundes/ hat er die tau-
ffe eingesetzt/ gepoten vnd befolhen vnter alle heiden/ wie Mat-
thaei vlti. stehet/ Gehet hin ynn alle welt/ vnd leret alle Heiden/
vñ teuffet sie ym namen des Vaters ꝛc. Gleich wie er mit Abra-
ham vnd seinem samen einen bund machet/ yhr Gott zu sein/
vnd zum zeichen des bundes die beschneitung gab. Hie stehet
vnsere gewisser grund vnd feste/ Nemlich/ das wir vns teuffen
lassen/ nicht darumb/ das ich des glawbens gewis sey/ Son-
dern das Gott geboten hat vnd haben wil. Denn ob ich gleich
keines glawbens nymer mehr gewis wurde/ so bin ich dennoch
des gepots gewis/ da Gott die tauffe gebeut / weil ers offent-
lich hat lassen ausgehen für aller welt. Hie kan ich nicht seilen/
Denn Gottes gepot kan nicht triegen/ Er hat aber niemand
von meinem glawben etwas gesagt/ gepoten noch befolhen.

War ist's/ das man glawben sol zur tauffe/ Aber auff den
glawben sol man sich nicht teuffen lassen. Es ist gar viel ein-
ander ding/ den glawben haben/ vnd sich auff den glawben
verlassen/ vnd also sich drauff teuffen lassen. Wer sich auff den
glawben teuffen lest/ der ist nicht allein vngewis/ sondern auch
ein abgöttischer verlenckter Christ/ Denn er trawet vnd bawet
auff das seine/ nemlich auff seine gabe/ die yhm Gott geben hat/
vnd nicht auff Gottes wort alleine/ gleich wie ein ander bawet
vnd trawet auff seine stercke/ reichtum/ gewalt/ weisheit/ heili-
ckheit/ welchs doch auch gabe sind von Got yhm gebē. Welcher
aber getaufft wird auff Gottes wort vñ gebot/ wenn da gleich
kein glawbe were/ dennoch were die tauffe recht vnd gewis/
denn sie geschicht/ wie sie Gott geboten hat/ Nütze ist sie wol
nicht

nicht dem vnglaubigen teufflinge / vmb seines vnglaubens
willen / Aber drum ist sie nicht vnrecht / vngewis odder nichts /
Wenn das alles solt vnrecht odder nichts sein / was den vn-
glaubigen nicht nütze ist / so wurde nichts recht noch gut blei-
ben / Denn das Euangelion ist auch aller welt zu predigen ge-
boten / der vnglaubige hörets vnd ist yhm nichts nütze / solts
aber darumb auch nicht ein Euangelion odder vnrecht Euan-
gelion sein ? Gott selbs ist dem gottlosen kein nütze / solt er
darumb nicht Gott sein ?

Wenn nun gleich ein alter mensch solt getaufft werden / vnd
spreche / Herr ich wil mich teuffen lassen. So fragestu / Glaub-
stu dem auch ? wie Philippus den Kemerer Acto. iij. vnd wir
teglich die teufflinge fragen / So wird er mir nicht so her faren
vnd sagen / Ja / ich wil wol berge versetzen durch einen glaw-
ben / Sondern also / Ja herr ich glawbe / aber auff solchen glaw-
ben bawe ich nicht / Er mocht mir zu schwach odder vngewis
sein / Ich wil getaufft sein auff Gottes gebot / der es haben wil
von mir / Auff solch gebot wage ichs / mit der zeit mag mein
glawbe werden / wie er kan / Wenn ich auff sein gepot getaufft
bin / so weis ich / das ich getaufft bin / Wenn ich auff meinen
glawben getaufft wurde / solt ich morgen wol vngetaufft fin-
den werden / wenn mir der glawbe entfiel / odder ich angefoch-
ten wurde / als hette ich gestern nicht recht geglaubt. Mir nicht /
Er sechte Gott vnd sein gepot an / darauff ich getaufft bin / das
ist mir gewis genug / Mein glawbe vnd ich stehen vnser eben-
thear / Gleube ich / so ist mir die tauffe nütze / glawbe ich nicht / so
ist sie mir nicht nütze / Aber die tauffe ist darumb nicht vnrecht
odder vngewis / stehet auch nicht auff euenturo / das ist / auff
ebenthear / sondern auff dem gewissen Gottes wort vnd gebot.

Also wird er auch sagen von seiner kinder tauffe / Ich dan-
cke Gott vnd bin frölich / das ich ein kind getaufft bin / denn da
E habe

habe ich gethan/was Gott geboten hat/ Ich habe nu gegleube
odder nicht/so bin ich dennoch auff Gottes gebot getaufft/die
tauffe ist recht vnd gewis/ Gott gebe/mein glawbe sey noch heu
tiges tages gewis oder vngewis/ Ich mag denckē/das ich noch
gleube vnd gewis werde/ An der tauffe feilet nichts/am glau
ben feilet ymer dar/ Denn wir haben an dem glawben gnug zu
lernen vnser leben lang/ Vnd er kan fallen/das man sagt/ Sie
he/da ist glawbe gewesen/vnd ist nicht mehr da/ Aber von der
tauffe kan man nicht sagen/Sihe/da ist tauffe gewesen/vnd ist
nu nicht mehr tauffe. Nein/sie stehet noch/ denn Gottes gebot
stehet noch/vnd was nach seinem gebot gethan ist/stehet auch
vnd wird auch bleiben/

Bisher haben wir/meins dinc̄ens/ starck gnug beweiset/
das die widderteuffer vnrecht thun/das sie die erste tauffe ver
nichtigen/wenn sie gleich gewis weren/das die kinder on glaw
ben getaufft worden/des sie doch auch nicht gewis sein können/
Widderumb/das die kinder glawben/das können wir auch mit
keinem spruch beweisen/der so hell vnd klar eraus sage mit sol
chen odder der gleichen Worten/ Ihr solt die kinder teuffen/den
sie glawben auch. Wer vns auff solche buchstaben zu beweisen
dringet/dem müssen wir weichen vnd gewonnen geben/ Wir
finden sie nirgent beschrieben. Aber frume vernunfftige Chris
ten begeren solchs nicht/ Die zenckische halstarrige Kotten
thuns/auff das sie klug gesehen werden. Widderumb werden
sie auch keinen buchstabē bringen/der da sage/ Ihr solt alte len
te teuffen vnd kein kind. Doch das kinder teuffen recht sey/vnd
sie auch glawben/ bereden wir vns aus vielen starcken vrsa
chen.

Erstlich/ weil solch kinder teuffen von den Aposteln her
kompt/vnd sint der Apostelzeiten geweret hat/ so können wir
nicht weren/mussens so lassen bleiben/weil niemand bisher hat
magen beweisen/das die kinder ym der tauffe nicht glawben/
odder

odder solch teuffen vnrecht sey / Denn ob ich gleich vngewis
were / das sie glewbtē / so muste ich doch meines gewissens hal
ben sie teuffen lassen / Sinte mal es viel besser ist / das die tauffe
vber die Kinder gehe / denn das ich sie abthet / Denn wo die tauffe
recht vnd nütze were vnd seligete die Kinder (wie wir glew
ben) vnd ich thete sie abe / so were ich schuldig an allen Kin
dern / so on tauffe verloren wurden / das were grausam vnd er
schrecklich / Were sie aber vnrecht / das ist / vnnütze / vnd hulffe
die Kinder nichts / so were damit nichts anders gesündigt / denn
das Gottes wort were vergeblich gesprochen vnd sein zeichen
vergeblich gegeben / Ich were aber damit keiner verloren seelen
schuldig / sondern des vergeblichen brauchhs an Gottes wort
vnd zeichen.

Aber solchs wurde mir Gott leichtlich vergeben / weil ichs
vnwissen thet / vnd dazu aus furcht thun muste / als der ichs
nicht ertichtet / sondern also von anfang auff mich kōmen were
vñ mit keiner schrift beweisen k̄nd / das vnrecht sey / vñ vnger
ne thet / wo ichs vberweiset wurde / Vñ were zwar schier gleich /
als wenn ich Gottes wort / das ich auch aus seinem befehls mus
predigen / vnter die vnglewbtigen vergeblich predigete / odder
wie er sagt / die perlen für die sew / vnd das heiligthum für die
hunde wurffe / Was k̄ndte ich dazu? Zie wolt ich auch lieber
daher sundigen / das ich vergeblich predigete / denn dort hin /
das ich gar nichts wolt predigē / den mit vergeblicher predigt /
werde ich keiner seelen schuldig / Aber mit nicht predigē / moch
te ich vieler seelen schuldig werden / Ja es were allzu viel an ei
ner. Dis sage ich / wenns gleich so were / das der Kinder glawbe
vngewis were / auff das man die gewissen tauffe vmb vnges
wissens glawbē willen nicht nachlasse / weil wirs nicht erfundē /
sondern also von der Apostelzeit her empfangen haben / Denn
man sol nichts vmbstossen odder endern / was man nicht mit
heller schrift kan vmbstossen odder endern. Gott ist wunder
lich yn

lich ynn seinen wercken/ Was er nicht haben wil/ da zeuget er
gnugsam von ynn der schrift/ was er daselbs nicht zeuget/ das
las man gehen/ als sein werck/ wir sind entschuldiget/ Er wird
vns nicht versuren/ Das were wol ein böse stücke/ wenn wirs wu
sten odder glaubten/ das der kinder tauffe vntüchtig were/ vnd
teufften sie gleich wol/ wie die Valdenser thun/ Denn damit
spottet man Gott vnd sein wort.

Zuffs ander/ ist das ein gros anzeigen/ Es ist noch nie kei
ne ketzerey endlich bestanden/ sondern allezeit auch ynn kurtz/
sagt Sanct Petrus/ an tag komen vnd zu schanden worden/
wie Sant Paulus Jannes vnd Jannes einfuret/ vnd yhr glei
chen/ das yhr torheit endlich yederman offenbar ist worden ic.
Were nu der kinder tauffe nicht recht/ furwar Gott he te es so
lange nicht lassen hin gehen/ auch nicht so gemein ynn aller
Christenheit durch vnd durch lassen halten/ Sie hette auch
endlich müssen ein mal zu schanden werden fur yederman/
Denn das izt die widderteuffer sie schenden/ ist noch vnausges
furt/ vñ heist noch nicht zu schandē worden/ Gleich wie nu Got
erhalten hat/ das die Christen ynn aller welt die Biblia/ fur
Biblia/ das Vater vnser/ fur Vater vnser/ den kinder glauben/
fur glauben/ halten/ Also hat er auch die kinder tauffe erhal
ten vnd nicht lassen vntergehen/ vnd doch daneben alle ke
zerey sind vntergangen/ die viel iünger vnd newer sind gewest/
denn der kinder tauffe. Solch wunder werck Gottes zeiget an/
das die kinder tauffe mus recht sein/ Denn solchs hat er am
Bapstum nicht geubt/ welchs dazu auch ein new ding ist/ aber
noch nie bey allen Christen ynn aller welt also angenommen/ wie
der kinder tauffe/ Biblia/ glauben/ Vater vnser ic.

Sprichstu/ Solchs schleust noch nichts/ das der kinder
tauffe gewis sey/ Denn es ist kein spruch aus der schrift. Ant
wort/ Das ist war/ es schleust nicht starck gnug mit spruchen/
das du

das du kinder tauffe drauff mochtest anfahen bey den ersten
Christen nach den Aposteln / Aber es schleust gleich wol so
viel / das izt bey vnser zeit niemand mit gutem gewissen thar
der kinder tauffe / so lange her bracht / verwerffen odder lassen
fallen / weil sie Gott mit der that nicht allein dildet / sondern
auch handhabt / von anfang / das sie noch nie ist vntergangen /
Denn wo man Gottes werck sihet / mus man eben so wol wei-
chen vnd glewben / als wo man sein wort horet / Es sey denn /
das offentliche schrift solch werck vns anzeige zu meiden / Als
das Bapstum liesse ich auch warlich gehen vnd stehen / als ein
Gottes werck / Aber weil die schrift dawidder ist / halt ichs wol
fur ein werck Gottes / aber nicht fur ein werck der gnaden / son-
dern des zorns / das zu fliehen ist / Als alle andere plagen auch
Gottes werck sind / aber ym zorn vnd vngnaden.

Zuffs dritte / ist des gleichen Gottes werck / das Gott alle
zeit vielen / so kinder getaufft sind / gegeben hat grosse heilige
gaben / sie erleucht vnd gesterckt mit dem heiligen geist vnd
verstand der schrift / vnd grosse ding durch sie gethan ynn der
Christenheit / als Johanni Zus vnd seinen gesellen zu der zeit /
vnd vor yhm vielen andern heiligen / Wie er izt auch thut fast
vielen seinen leuten / Vnd treibt doch der Keinen zu vor zu der
widdertauffe / welchs er on zweifel thun wurde / wo ers da fur
hielte / das sein gebot von der tauffe nicht recht gehalten were /
Denn er thut nichts widder sich selbs / so bestettiget er auch
nicht mit seinen gaben den vngheorsam seines gebots . Weil er
denn solche gaben gibt / die wir bekennen müssen / das es Gottes
heilige gaben sind / so bestettiget er freilich damit die erste tau-
ffe vnd helt vns fur recht getaufft . Also beweisen wir mit diesem
werck / das die erste tauffe recht / vnd die widdertauffe vnrecht
sey / gleich wie Sant Petrus vnd Paulus Act. xv. auch aus dem
wunder / da Gott den Heiden den heiligen geist gab / beweise-
ten diesen Gottes willen / das die Heiden nicht mussten Moses
gesetz halten.

¶ ij Aufs

Auffs vierde/ Wo die erste odder kinder tauffe nicht recht were/ so wurde folgen/ das lenger denn ynn tausent iaren/ keine tauffe vnd keine Christenheit gewesen were/ welchs ist vnmöglich/ Denn damit wurde der artickel des glawbens falsch sein/ Ich glerobe eine heilige Christliche Kirche. Denn vber tausent iar fast eitel kinder tauffe gewesen ist/ Ist die tauffe vnrecht/ so ist die Christenheit so lange zeit on tauffe gewesen / Ist sie on tauffe gewesen/ so ist sie nicht Christenheit gewesen/ Den die Christenheit ist Christus braud/ yhm vnterthan vn̄ gehorsam/ hat seinen geist/ sein wort/ seine tauffe/ sein sacrament vn̄ alles was Christus hat/ Vnd zwar wenn die kinder tauffe nicht gemein ynn aller welt/ sondern bey etlichen were angenommen/ (wie das Bapstum) so mochten die widderteuffer einen schein haben/ vnd die selbigen annemer straffen/ gleich wie wir straffen die geistlichen/ das sie das Sacrament zum opffer gemacht haben/ welchs bey den leihen doch ein Sacrament ist blieben. Aber weil ynn aller welt durch die ganze Christenheit die kinder tauffe gangen ist bis auff diesen tag/ ist kein schein nicht da/ das sie vnrecht sey/ Sondern ein starck anzeigung/ das sie recht sey.

Auffs funffte/ Hiez zu stimmet nu auch diese schrift/ da S. Paulus vom Ende christ saget. ij. Thessaloni. ij. Das er sitzen solle ynn Gottes tempel/ danon wir droben weiter gehöret haben. Ists Gottes tempel/ so ist nicht eine ketzer gruben/ sondern die rechte Christenheit/ Welche mus für war die rechte tauffe haben/ da mus kein zweiucl an sein. Tu sehen vnd hören wir la keine ander/ denn kinder tauffe/ beide vnter dem Bapst/ Turcken vnd ynn aller welt. Item/ das Christus heist die kindlin zu yhm komen vnd brengen Matth. xix. vnd spricht/ das reich Gottes sey yhr. Item/ das die Apostel ganze heuser getaufft haben. Item/ das Johannes den kindlin schreibt. Item/ das S. Johannes ynn mutter leibe glerobig ward/ wie solchs droben

droben gesagt ist. Ob etlich dieser sprüche den schwermern nicht gnug thun/ da ligt mir nicht an / Mir ist gnug/ das sie dennoch yederman das manl stopffen/ das sie nicht können sagen/ Die kinder tauffe sey nichts/ Sie sey bey yhn gleich ungewis/ so habe ich gnug/ das sie müssen die selbigen hinfort nicht so zu nicht machen/ sondern ym zweifel vnter sich bleiben lassen / Uns aber ist sie gewis gnug / weil sie nirgent widder die schrift/ sondern der schrift gemesse ist.

Auffs sechste / Weil Gott seinen bund mit allen Heiden macht durchs Euangelion/ vnd die tauffe zum zeichen einsetzt/ wer kan da die kindlin ausschliessen? Hat nu der alte bund vnd das zeichen der beschneitung Abrahams kinder glewbig gemacht/ also das sie Gottes volck waren vnd hiessen/ wie er spricht/ Ich wil deines samen Gott sein. So mus viel mehr dieser newe bund vnd zeichen so krefftig sein vnd zu Gottes volck machen/ die/ so es annemen. Tu gebeut er/ alle welt solle es annemen/ Auff solch gebot (weil niemand ausgeschlossen) teuffen wir sicher vnd frey yderman/ auch niemand ausgeschlossen/ on die sich dawidder setzen/ vnd solchen bund nicht wollen annemen. Wenn wir seinem gepot nach/ yederman teuffen/ so lassen wir yhn sorgen/ wie die taufflinge glewben/ Wir haben verthan/ wenn wir predigen vnd teuffen. Haben wir nu nicht sonderliche sprüche/ die von den kindern zu teuffen sagen/ so wenig auch sie haben sprüche/ die von alten leuten zu teuffen gepieten/ So haben wir doch das gemein Euangelion vnd gemeine tauffe ym befelch/ yederman zu reichen/ daryn die kinder auch müssen begriffen sein / Wir pflanzen vnd begiffen/ vnd lassen Gott gedeien geben.

Summa/ die widderteuffer sind zu frenel vnd frech/ Denn sie sehen die tauffe nicht an für eine Göttliche ordnung odder gebot/ sondern als were es ein menschen tand/ wie viel andere Kirchen

Kirchen breuche sind vnter dem Papst/ als von saltz / wasser/
Er unter weihen/ Denn wo sie es für ein Göttliche ordnung vnd
gebot hielten/ wurden sie nicht so lesterlich vnd schendlich das
von reden/ wenn sie gleich vnrecht gebraucht wurde. Tu sie
aber ynn der tollen meinung sind/ das teuffen gleich ein ding
sey/ wie wasser vnd saltz weihen/ odder kappen vnd platten tra
gen/ So faren sie heraus/ vnd heissens ein hunds bad/ item/ ein
hand vol wassers/ vnd der grewlichen wort viel mehr/ Gleich
als wer das Euan gelion für recht Gottes wort helt/ der le
sterts freilich nicht/ ob gleich viel sind/ die es nicht glauben noch
annemen/ odder auch felschlich brauchen. Wer es aber nicht für
Gottes wort hielte/ der wurde leichtlich auch so her faren/ le
stern vnd sagen/ Es sey fabel/ mehrlin odder narren teidinge/
vnd der gleichen / Vnd solt leicht geschehen/ das er schüler
kriegt/ die solchen lester Worten glerobten.

Denn das soltestu wol sehen/ Wenn die widderteußler het
ten sollen zu erst mit gutem grunde yhre meinung beweisen/ so
hetten sie nicht viel leute verßuret noch an sich bracht/ Denn sie
haben nichts bestendiges noch gewisses für sich/ Aber damit
bringen sie viel leute an sich/ das sie grosse prechtige lester wort
füren widder die tauße/ Denn der teuffel weis wol/ das/ wenn
der tolle pobel prechtige lester wort höret/ so felt er zu/ vnd glen
bet flux/ fraget nicht weiter/ nach grund odder vrsache. Als
wenn sie hören sagen/ Die tauße ist ein hunds bad/ vnd die teu
ßler sind falsche vnd bubische bader knechte. So faren sie das
her/ Ey so las sich der teuffel teuffen / Vnd Gott schende die
falschen bader knechte etc. Das ist denn yhr grund/ da stehen sie
auff/ vnd haben sonst nichts mehr damit sie die tauße anfech
ten. Denn alle die ich gehöret habe/ Ja mit mir von solchen sa
chen reden/ Wenn diese prechtige lester wort (Hunds bad/ Ba
der knecht/ Hand vol wasser etc.) sind aus gewesen/ so sind sie
gestanden/ als die beschoren menlin/ vnd ist nichts mehr das
hinden

hinden gewest/ damit sie yhren yrthum beschirmen.

Aller dinge/ gleich wie der teuffel die Sacrament lesterer auch betreugt/ Denn weil er wol fulet/ das er nichts gewisses kan auffbringen/ fur seine lügen/ feret er zu/ vnd fullet zuvor dem tollen pobel die ohren mit solchem prechtigem lestern/ das vnser Sacrament sey ein fleisch fressen vnd blut sauffen/ vnd der gleichen/ Wenn die selbigen prechtigen wort aus sind/ so hat als bald alle yhre kunst auch ein ende/ vnd sagen die weil von Christus hymel fart 2c. Eben also thun die Juden heutiges tages/ das sie yhre kinder bey yhrem glawben erhalten/ lestern sie Christum greulich/ heissen yhn/ Thola/ vnd liegen gestrost von yhm/ Das schreckt denn ein vnschuldiges/ einfeltiges hertz ab/ vnd versuret/ wie Sant Paulus spricht Roma. xvi. Darumb haben sie allzumal gut thun/ weil sie mit prechtigem lestern die leute können furen/ wie sie wollen/ vnd durffen yhres yrthums keinen gewissen grund anzeigen/ Wenn sie aber zuuor yhr ding bestendiglich vnd wol gegruendet hetten/ da gien ges denn wol hin/ das man der lügen gute schlappen gebe vnd strieche sie mit rechter farben aus.

Weil aber wir wissen/ das die tauffe ein Göttlich ding ist/ von Gott selbs eingesetzt vnd geboten/ so sehen wir nicht auff den misbrauch der Gottlosen menschen/ sondern einfeltiglich auff Gottes ordnung/ Vnd finden also denn/ das die tauffe an yhr selbs ein heilig/ selig/ herrlich/ hymelisch ding ist/ ynn allen ehren/ mit furcht vnd zittern zu halten/ gleich/ wie alle andere Gottes ordnung vnd gebot/ als denn auch billich vnd recht ist. Das aber viel leute der selbigen misbrauchen / ist der tauffe schuld nicht/ Man wolt denn auch das Euangelion ein faul geschwertz lestern/ darumb/ das viel sind/ die sein misbrauchen/ Weil denn die widderteuffer nichts fur sich haben/ das ich noch gesehen vnd gehört habe/ denn eitel prechtige lester wort/ so sol sich billich ein yederman fur yhn schewen vnd hueten/ als die

S teuffels

tenffels gewisse boten / ynn die welt geschickt / Gottes wort
vnd ordnung zu lestern vnd verkeren / auff das die lente ia nicht
dran glauben vnd selig werden / Denn sie sind die vogel / so den
samen auffressen / der an den weg geseet wird Matth. xiiij.

Vnd zur letze sage ich das / Wenn gleich yemand nie ge-
taufft were / wuste doch nicht anders odder glewbt starck / das
er recht vnd wol getaufft were / so wurde yhm solcher glawbe
dennoch gnug sein / Denn wie er glewbt / so hat ers fur Gott /
Vnd ist dem glewbigen alle ding miglich (spricht Christus)
Vnd solchen kundte man nicht widderumb tenffen / on fahr
seines glawbens / Wie viel weniger sol man die widderumb
tenffen / die gewis sind / das sie getaufft sind? Gott gebe / sie ha-
ben dazumal geglewbt odder nicht / Denn die widdertenffer
vermügen nicht gewis zu sein / das yhr widdertenffen recht sey /
Weil sie auff den glawben yhr widdertenffen gründen / wel-
chen sie doch nicht wissen können / vnd also des vngewissen spie-
len mit yhrem widdertenffen. Tu ist es sunde vnd Gott versu-
chen / wer ynn Göttlichen sachen vngewis vnd zweifelhafftig
ist / Vnd wer vngewissen wahn / fur gewisse warheit leret / der
leuget eben so wol / als der offentlich widder die warheit redet /
Denn er redet / das er selbs nicht weis / vnd wils dennoch fur
warheit haben. Wenn sie aber auff Gottes befehl vnd gebot /
das tenffen gründen wolten / so wurden sie bald sehen / das die
widdertauffe kein nütze noch not were / weil dem Göttlichen
gebot schon zuvor gnug were geschehen mit der ersten tau-
ffe.

Dazu so lestern vnd verleucken sie auch Gottes gebot vnd
werck / Denn weil die erste tauffe Gottes gebot ist / vnd dem sel-
bigen mit der that gnug geschehen ist / vnd sie doch sagen / Es
sey vnrecht vnd ein hunds bad / Was ist das anders gesaget /
denn Gottes gebot vnd werck sey vnrecht vnd ein hunds bad?
Vnd sa

Vnd sagen dazu solchs aus keinem andern grund/ denn das sie
den glawben wollen ynn der tauffe gewis haben/ Vnd können
yhn doch nicht gewis haben/ Das heist vmb vngewissen wahn
Gottes gewisses gebot vnd werck freuelich vnd schendlich ver-
leucktet vnd gelestert.

Ich setze aber gleich/ das die erste tauffe on glawben sey/
Sage mir/ welchs vnter den zweien/ das grössert vnd furne-
mest sey/ Gottes wort/ odder der glawbe? Ists nicht war?
Gottes wort ist grösser vnd furnemlicher/ denn der glawbe/
Sintemal nicht Gottes wort auff den glawben/ sondern der
glawbe auff Gottes wort sich bauet vnd gründet/ Dazu/ der
glawbe ist wanckelbar vnd wandelbar/ Aber Gottes wort
bleibt ewiglich. Weiter sage mir/ wenn eins vnter diesen zweien
sol ander weit werden/ Welchs sol billicher anderweit werden?
das vnwandelbar wort/ odder der wandelbar glawbe? Ists
nicht also? das billich der glawbe ander weit werde/ vnd nicht
Gottes wort? Es ist ia billicher/ das Gottes wort einen an-
dern glawben mache (so zumor kein rechter da gewesen ist)
denn das der glawbe ander weit das wort mache/ Weil sie denn
bekennen müssen/ das ynn der ersten tauffe nicht an Gottes
wort/ sondern am glawben mangelte/ vnd nicht ein ander wort/
sondern ein ander glawbe not sey. Warumb handeln sie denn
nicht viel mehr/ das ein ander glawbe werde/ vnd lassen das
wort vnuerendert? Sol nu Gottes wort vnd ordnung darumb
vnrecht heissen/ das wir nicht recht dran glawben? So wils
langsam vnd selten ein recht wort werden. Wenn sie nu gleich
yhem eigen dincckel recht thun wolten/ so solten sie nicht eine
widdertauffe/ sondern einen widderglawben anrichten/ Denn
dies tauffe ist Gottes wort vnd ordnung/ vnd darff keines wida-
der werdens odder ander werdens/ der glawbe aber darff wol
eins ander werdens/ (wenn er nicht da gewesen ist) Darumb
solten sie billich widderglawbler/ vnd nicht widderteuffler sein!

S ij wenn

wenn sie auch gleich recht hetten/ als sie doch nicht haben.

Weil denn solche teuffler yhrer sachen aller dinge ungewis sind/ darynn sie auch als lügener befunden werden/ verleuckten dazu vnd lestern Gottes ordnung/ aus ungewissem lügen wahn/ vñ keren das hinderst zu fodderst/ gründen Gottes wort vnd ordnung auff menschen werck vnd glawben/ suchen auch tauffe/ da sie glawben suchen solten/ vnd werden also als die yrrigen/ ungewissen/ verkerte geister vberzeuget/ wird sich ein iglicher frummer Christ/ bey seiner seelen seligkeit wol für yhn hueten. Das helff vnd gebe Christus vnser Herr/ Amen.

So viel wollet irzt ynn der kurtz vnd eile für gut nemen/ Denn ich dieser zeit anders zu thun/ mich nicht ganz ynn diese sache geben kan/ Auch/ wie gesagt ist/ ich noch nicht ganz yhren grund weis/ Denn der teuffel ist zornig/ vnd wirfft das hundert yns tausent/ vnd richt so mancherley gewirre an/ das schier niemand weis/ was er gleybt. Die widderteuffer haltens mit den Sacraments feinden/ das eitel brod vnd wein ynn abentmal sey. Widderumb halten die Sacramenter anders von der tauffe/ denn die widderteuffer/ So sind auch die Sacramenter vnternander nicht eins/ desselbigen gleichen die widderteuffer auch nicht vnternander eins/ On allein auff vns vnd widder vns sind sie eins/ Gleich wie das Papstum ynn so vnzellige rotten der paffen vnd Mönche zurtrennet/ sich selbs vnternander bis her frassen/ vnd nu allzumal vber vns eins werden. Weltliche fürsten vnd herrn auch also/ Es mus Pilatus vnd Herodes vber vnd widder Christum eins werden/ die sonst tod feind an einander sind. Doch ist der widderteuffer yrthum leidlicher/ denn der Sacramenter ynn diesem stuck/ Denn die Sacramenter machen die tauffe ganz zu nicht/ Aber diese machen sie new/ Da ist doch noch hülfte vnd rat/ das sie zu recht komen mugen. Wolan/ Es ist doch so viel aus gericht/ das die widderteuffer ungewissen wahn vnd glawben haben/ vnd sie yhr ding nicht beweisen. Denn


Dem auch der Satan durch alle Schwermer izt nicht
mehr thut/denn das er eitel vngewis ding auffbringet / Vnd
meinet/es sey gung/ wenn er könne hoffertiglich vnd verecht-
lich von vns reden/ als die Sacraments Rotten thun. Da wil
Keiner seinen dänckel gewis machen vnd beweisen / Aber alle
yhre muhe ist/das sie vnsern verstand mochten verdecktig vnd
vngewis machen. Suspitiones docent/ non fidem. Vnd hei-
ßens denn schrift vnd Gottes wort/ Denn der teuffel sihet/
das er widder die helle sonne der warheit nichts kan/ darumb
webt er ynn den staub / vnd wolt gerne einen nebel für vnsern
augen machen/das wir das liecht nicht sehen solten/ Vnd ym
nebel hellt er vns eitel yrrer wissche für/das er vns versure/ Das
ist/ weil sie yhren dänckel gefasset haben / versuchen sie
sich / wie sie schrift drauff reimen vnd mit den haren
hinzu zihen/ Christus aber/ so bis her vns trewlich
beigestanden hat/ wolte fürder den Satan vns
ter vnser fusse treten / vnd euch alle be-
hueten/ auch für ewers Tyrannen vnd
Endechrists versurunge/ vnd gnes-
diglich zu seiner freiheit hel-
ffen / A M E N.

Gedruckt zu wittenberg/
durch Hans Luft.

Faint, illegible text, likely bleed-through from the reverse side of the page. The text is arranged in several lines and is mostly obscured by the paper's texture and some foxing.

Bezeichnet die ...
Kirche ...





1627
1628



76 L 10 83



ULB Halle 3
004 173 163



No 21 5b.

5.





9

Von Der
Widdertauffe
an zween pfarhern/
Ein brieff
Mart. Luther.
wittenberg.
M.D. XXVIII.